

INUIT ATAQATIGIIT

Inatsisartuni



UKA 2017/20

12.11.2017

Kelly Berthelsen

Uunga siunnersuut: Inuit innarluutillit tapersorsorneqarnissaannut

Inatsisartut Inatsisaat nr. xx, xxx xx 2017-imeersoq.

(Ilaqtariinnermut, Naligiissitaanermut, Isumaginninnermut Inatsisinillu atutsitsinermut Naalakkersuisoq)

Aallartitsivitsinnanga oqaatigeqqaassavara oqaatsit innarluutillit aammalu innarluuteqalersimasut kalaalisut oqaatsitsinni assigiinngitsumik atorneqarlutillu isumaqartinneqartalaruartut matumani inatsisisstatut siunnersuummi oqaaseq atorneqartoq – tassalu innarluutillit - saqqummiussisummi matumani atorneqassammat.

Siullermik Inuit Ataqatigiiniit oqaatigissavarput nuannaarutigilluinnaratsigu innarluutillit pillugit inatsisikkut erseqqissarneqarmat innarluutillit inuiaqatigiinni allat tamaasa assigalugit sutigut tamatigut nalinginnaanerpaamik inooqataanissaminut pisinnaatitaaffeqassasut.

Tamatumuunakkut inuiaqatigiittut ukiorparujussuunngitsut ingerlanerini alloriarsimaqaagut. Qangarsuunngitsoq angumeraarpot innarluutillit annertuumik ikiortariaqarsimagaangamik Qallunaat Nunaannut aallartitaasarnerat. Taamani innarluutillit ilaquaasulluunniit tarnikkut atugaat pisinnaatitaaffili tunulliunneqartarsimapput timikkut atugarissaarnissaat salliutinneqartarsimammatt.

Qujanartumilli maanna tarnikkut atukkat, soorlu allat naligalugit inuiaqatigiinni periarfissaqartitaanissaq, nammineerluni angerlarsimaffeqarnissaq, ilami allaat naleqqussakkamik suliffeqarnissaq pingaartinneqalersimammata innarluutillit nunatsinniiginnarlutik tarnikkut atugarissaarneruleqaat.

Atukkali pitsangorsartuagassaapput, pingaartumillu innarluutillit ikiortariaqarfisigut ikuisussat suliassaminut ilinniartinneqarluarnissaat aalluttariaqarparput, matumngalu ilanngullugu naalakkersuisut kajumissaarniarpavut isumaginninnermi sulisussanik ilinniartitsineq aallulluaqqullugu.

Kikkut sullinneqarnissaat pillugu aalajangersakkat § 7 imm. 2-miittut isumaqatigalugillu paasilluaraluarlugit makku inatsisiliornermi isummerfigineqartariaqartutut isigaavut: Sivisumik piginnaasalikillisimaneq qanoq paasisariaqarnersoq eqqarsaatigalugu isumaqarpugut aalajngersagaq taanna sukumiinerusumik erseqqissarneqassasoq ilaatigut inuit napparsimarulussimallutik annertuumilluunniit suliaritissimallutik sivisunerusumik sungiusaqqittariaqartut ilaatinneqartussanngorlugit. Tamakkumi atorfegarsimagnik ullullu 120 sinnerlugit uninngasariaqassagunik suliffimminnit so-raarsitaassapput pisortallu ikorsiissutaannaannik isumalluuteqalissallutik, imaluunniit suliffeqarsimannngikkunik annikitsuaraannarnik ikiorserneqartarsinnaassallutik. Taa-mammat paaserusupparput sivisunerusumik sungiusarneqartariaqartut katsorsar-neqartariaqartulluunniit innarluutilittut ikiorserneqartartutulli pisinnaatitaaffeqarnersut ikiorserneqarnissaq eqqarsaatigalugu.

§ 9-imi aalajangiisinnaatitaanermut akisussaaffinnullu tunngatillugu innarluutillit najuqarfinnut inissineqarnissaat pillugu kommunit inassuteqaateqartartussaapput, naalakkersuisullu aalajangiisartussaallutik, taavalu naammattumik inisaqartitsisoqarnissaat naalakkersuisut isumagisassarissallugu. Pisariillisaanissaq eqqarsaatigalugu takorloorneqarsinnaannnginnerpoq kommuninut ataatsimoortumik tapiissutit aqqutigalugit innarluutilinnik najugaqarfinnut inissiisarnermut tunngasut tamarmik, soorlu aalajangiisarnerit, kommuninut suliassangortinneqarnissaat, tasami ukiorpaaluit qaangiuppulli innarluutilinnut suliassaqarfik kommuninut tunniunneqareersimammat.

Taava tamatuma malitsigisaanik marloqiusamik nakkutilliinissaq § 13 aamma 14-imi taaneqartoq pisariaqarunnaassagaluarpoq taamalu qitiusumik nakkutilliisoqarfik kisimik nakkutiginnittalissagaluarluni kommunillu angerlarsimaffinnik ingerlatsilissagaluarlutik.

Immaqa taamaaliornissaq inatsisisakkut ugguna angivallaamik alloriarnerussagaluarpoq, kisianni siunissami kommuninut suliassaqarfinnik nuussuineq aammalu marloqiusamik ingerlatsiunnaarnissaq siunertaralugu akisussaaffimmik tamakkiinerusumik kommuninut tunniussinissaq siunissami siunniunneqartariaqarpoq.

Inatsisisakkut aamma siunertaavoq innarluutillit sapinngisamik angerlarsimaffimminniiginnassasut. Taamaassappat assersuutigalugu sineriassuatsinni angajoqqaat sapinngisamik pitsaanerpaamik siunnersorneqartarnissaat anguniarlugu Nuna Tamakkerlugu Innarluutilinnik Sullissivimmait akuttungitsumik siunnersuiartorluni angalasoqartarnissaanut aningaasanik piareersimasoqartariaqarpoq inatsisikkut siunertineqartoq pitsaasumik kinguneqaqqullugu.

Aamma, annertuumik innarluutillit Qallunaat Nunaanniittut nunatsinnut utersinnaatiataanissaat pillugu erseqqissunik aalajangersaasoqassasoq kaammattutiginiarpapput tassami najugaqarfinnik neqeroorutit nunatsinni pigigutsigit nunatsinnut angerlarnisaannik periarfissittariaqaratsigit.

§ 23-mut tunngatillugu erseqqissaqqissavarput ullutsinni nappaatit qanga immaqa qaangigassaarsimannngikkaluartut katsorsarneqarsinnaalersimammata ilaannilu sivisumik suliaritinnermik nassataqartarlutik. Taama sivisumik suliaritittut ataavartunngikkaluamik innarluuteqalersimasutut isigineqarlutik tamakkiisumik ikiorserneqartarnissaat qularnaqqoqaarput. Aamma timikkut anniaatit siornatigut immaqa annerusumik eqqumaffigineqanngitsut, soorlu tuip nagguaatigut aseruuttoornerit sivisumik naqqikiartortartut (qallunaatut koldskulder) sulisinnaajunnaalarnermik nassataqarsinnaasartut eqqarsaatigalugit ikorsiinerit taakkununnga atortinneqarsinnaanissaat eqqumaffigisariaqarpoq.

Ukiut ingerlanerinissaq takusarpavut qanigisaasut, soorlu aappat, angajoqqaat, imaluunniit qitornat qasusuillutik innarluutilinnik ikuisartut qanigisaanertillu pillugu tapersorsortitut nalinginnaasutut akissarsiaqartitaaneq ajortut. Suliat assigiit assigiimik akilerneqartartussaammata taakkuttaaq naleqquttumik akissarsiaqartitaanissaat aporfissaqartinneqassanngitsoq angusariaqarpoq.

Ikorsiinerup suunissaanik aalajangiisarnermut tunngasuni § 72-imiittuni inatsisip nalunaarutitaanik suliaqarnermi siuliani taaneqartut, ataavartuunngikkaluamik timikkut tarnikkullu pisinnaalluarunnaarutit, siornatigut immaqa isiginiarneqartarsimanngikkaluit, soorlu tuikkut aseruuttoornerit, ilanngullugit isiginiarneqartarnissaat kaammattutigeqqissavarput.

Taamma naatsunnguamik oqaaseqarluta erseqqissaatissat allannguutissatullu isumali-utigineqarsinnaasut ataatsimiititaliamit sukumiisumik suliarineqarnissaat kaammattutigalugu inatsissatut siunnersuut ataatsimiititaliamut susassaqartumut ingerlateqqinnejassasoq Inuit Ataqatigiinniit kaammattutiginiarparput.

Qujanaq